

Oqaatsinut politikki pillugu Inatsisartut inatsisaat

Kapitali 1

Siunertaq nassuaatitaalu

§ 1. Inatsisartut inatsisaanni siunertarineqarpoq nunap matuma oqaatsinut politikkianut sinaakkutissat erseqqissut qularnaassallugit, tamatumunnga ilagitillugu oqaatsitigut akuunerulersitsineq, makku aqutigalugit

- 1) kalaallit oqaasiisa oqaatsitut tamakkiisutut inuiaqatigiinnilu atugaasutut qularnaarnerisigut,
- 2) kalaallit oqaasiisa taakkualu ilitsoqqussaralugu oqaatsitut allamiutullu oqaatsitut ineriarornerisa nukittorsarnerisigut,
- 3) oqaatsitigut aporfiusartut pinaveersaarnerisigut peerniarnerisigullu, tamatumuuna marlunnik arlalinnillu oqaaseqarneq nukittoquaallunilu pisuussutinngooqullugu, aamma
- 4) Kalaallit Nunaat nalunngisaqarfiusumik inuiaqatigiiffittut nukittorsarniarlugu oqaasertusarnerup inuiaqatigiinni siuarsarneratigut.

§ 2. Oqaatsitigut akuunerulernissaq inunnut immikkoortunut pingasunut sammitinneqarpoq

- 1) kalaallisut ilikkarnissamik pisariaqartitsisunut,
- 2) danskisut tuluttulluunniit ilinniarnissamik pisariaqartitsisunut,
- 3) kalaallit kulturiannik, oqaluttuarisaanerannik inuiaqatigiinnilu pissutsinik ilinniartinneqarnissamik pisariaqartitsisunut.

Imm. 2. Oqaatsitigut akuunerulernissamik oqarneq paasineqassaaq pineqartuni taakkunani pingasuni oqaatsitigut aporfiusartut peerniarnissaat inunnnullu imm. 1-imi taaneqartunut oqaasertusaanissap nukittorsarnissaa, innuttaasut inuiaqatigiinni peqataasinnaanerat pitsangorsarniarlugu nunatsinnilu ataatsimoornermik misigisimaneq kinaassuserlu patajaallisarniarligit.

Kapitali 2

Oqaatsinut politikki

§ 3. Kalaallit oqaasii tassaapput Kalaallit Nunaanni pisortatigoortumik oqaasisut pisortatigullu ingerlatsinermi atugaasut.

Imm. 2. Kalaallit oqaasii sumiorpaluutinik pingarnernik pingasunik pinnguiteqarput. Sumiorpaluutit Avanersuarmi, Tunumi aamma Kitaani atorneqartut.

Imm. 3. Danskit oqaasii pisortatigut ingerlatsinermi atorneqarsinnaapput.

Imm. 4. Tuluit oqaasii allamiullu oqaasii allat pisariaqartitsineq malillugu atorneqarsinnaapput.

§ 4. Namminersorlutik ingerlatsisut minnerpaamik 10-nik sulisullit, aamma pisortat ingerlatsivii pisortatullu oqartussaasut oqaatsinut politikkimik ilusiliissapput.

Imm. 2. Oqaatsinut politikkimi imaritinneqarsinnaapput

- 1) pisortatut oqartussaaffiup imaluunniit suliffeqarfiup oqaatsitigut piginnaaffiinik erseqqissaaneq,
- 2) allamiut oqaasiinut kulturikkullu piginnaaffiinik ersersitsineq,
- 3) pisortatut oqartussaaffiup imaluunniit suliffeqarfiup avataanit oqaatsitigut isigineqarnerata ersersinnera,
- 4) suliffiup iluani avammullu attaveqaqtigiinnermi najoqqutassiat, aamma
- 5) sulisut piginnaasassaannut anguniakkat.

Imm. 3. Sulisitsisoq pisussaavoq sulisuminik immikkut pineqartumuinnaq oqaloqatiginnissalluni sulisup oqaatsinik aamma kalaallit kulturiannik, oqaluttuarisaanermik inuaqatiginnilu pissutsinik ilinniartitaanissamut pisariaqartitsinersoq.

Kapitali 3

Oqaasertusarneq

§ 5. Kalaallit Nunaanni najugaqvissut tamarmik pisinnaatitaapput kalaallisut danskisullu, kiisalu nunani tamalaani oqaatsinik atugaasunik ilikkarnissamut, oqalunnikkut allannikkullu, tassuunakkut inuaqatiginni inuunermut peqataasinnaaqqullugit ilitsoqqussaralugulu oqaatsiminnik atuisinnaallutillu ineriartortsisinnaaqqullugit.

Imm. 2. Naalakkersuisut tamanna pillugu isumasioqatigeereernikkut suliffeqarfimmi kattuffit susassaqartullu attuumassutillit allat peqatigalugit pisinnaatitaanerup imm. 1-imi taaneqartup piviusunngortinnejarnissaanut malittarisassiorsinnaapput, tassunga ilanggullugit pikkorissartitsinermik atuartitsinermillu neqeroorutit taakkununngalu peqataanissamut kiffaanngissuseqarneq pillugit.

Kapitali 4

Nakkutilliineq, kinguneqartitsinerit naammagittaalliuutillu

§ 6. Naalakkersuisut suliffeqarfuit oqartussaasullu inatsimmik malinninnerannik nakkutilliissapput. Naalakkersuisut nakkutilliineq Namminersorlutik Oqartussani oqartussaasunut sullissiveqarfinnullu allanut tunniussinnaavaa.

Imm. 2. Suliffeqarfuit namminersortut, pisortani oqartussaasut sullissiveqarfillu § 4-mi taaneqartut nakkutilliisoqarfimmit qinnuigineqarnermikkut suliffeqarfiup, oqartussaasut sullissiveqarfiulluunniit oqaatsinut politikkianik nassiuississapput, kiisalu oqaloqatiginnerit § 4, imm. 3-mi pineqartut pisimanerinut uppernarsaallutik. Nakkutilliisoqarfik suliffeqarfinni namminersortuni, pisortani oqartussaasuni sullissiveqarfinnilu § 4-mi taaneqartuni aamma paasissutissanik nakkutilliisussaatitaanerup isumagineqarnissaanut pisariaqartunik pissarsisinnaapput.

Imm. 3. Inatsisartut suliffeqarfii nakkutilliisussaatitaanngillat.

§ 7. § 4, imm. 1-imik aamma 3-mik unioqqutitsineq akiliisitaassutigineqarsinnaavoq.

Imm. 2. Pisussaaffiinik § 6, imm. 2-mi taaneqartunik malinninnginneq akiliisitaassutigineqarsinnaavoq.

§ 8. § 4, imm. 1 naapertorlugu oqaatsinut politikkiliorsimannginneq, kiisalu § 4, imm. 3-mi taaneqartutut oqaloqatigiissimannginneq pillugit naammagittaalliuutit nakkutilliisoqarfimmut tunniunneqarsinnaapput.

Kapitali 5

Atuutilersitsineq ikaarsaariarnermilu aalajangersakkat

§ 9. Inatsisartut inatsisaat ulloq 1. juli 2010 atuutilerpoq.

Imm. 2. Suliffeqarfinni ataasiakkaani oqaatsinut politikki, tak. § 4, imm. 1, kingusinnerpaamik ulloq 1. oktober 2010 naammassineqareersimassaq.

Namminersorlutik Oqartussat, ulloq 19. maj 2010

Kuupik Kleist

/

Mimi Karlsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviit

Naalakkersuisut